



## PROPOSICIÓN SOBRE UNHA MAIOR INFORMACIÓN Á CIDADANÍA DOS DETALLES DA FUTURA ORDENACIÓN DO TRANSPORTE PÚBLICO MUNICIPAL

O **Grupo Municipal do Partido Popular**, ao abeiro do Regulamento Orgánico Municipal, presenta, para a súa inclusión no Pleno, a seguinte **PROPOSICIÓN**:

### EXPOSICIÓN DE MOTIVOS

O proceso -pendente- de licitación dun novo contrato de xestión do transporte urbano debe implicar unha redefinición das liñas, a fin de facer unha rede máis racional e adecuada ás demandas e necesidades da poboación actual e futura, e tal redefinición debe constituír unha das pedras angulares na planificación da mobilidade sustentable.

Conforme a iso, sería preciso intensificar ao máximo os esforzos por achegar as previsións que se teñen realizado ao conxunto da cidadanía. Certo é que se teñen realizado varias reunións con colectivos e entidades, tratando de expoñer e recoller informacións ao respecto, pero continúa a notarse unha notable carencia de información entre a cidadanía sobre unha modificación de gran calado que, en maior ou menor medida, condicionará a todos e cada un dos veciños e veciñas de Santiago.

Bótanse en falta medidas que transparenten e poñan ao alcance de cada unha das persoas usuarias e potenciais usuarias do transporte urbano cuestións vitais en relación co novo modelo; medidas que mostren as diferenzas que se prevén no relativo a conexións, tempos de acceso, tempos de espera, tempos de viaxe, con gráficos ou elementos sinxelos e comparativos (tablas, mapas de isocronas, mesmo simuladores de viaxes que poderían ser consultados vía web) que permitan apreciar con detalle a concreción das novas relacións de mobilidade que se están a propor. En definitiva, cómpre unha ampliación da información pública que permita coñecer en detalle, e en termos comparativos coa anterior rede, unha planificación que, pola súa inserción nun contrato que terá unha duración de moitos anos, afectará ao modo de vida e á actividade diaria da práctica totalidade da veciñanza.

Como complemento do anterior, tamén resulta oportuno ofrecer os fundamentos técnicos e sociais que están na base da nova proposta de liñas, toda vez que o documento de "caracterización da nova rede de transporte público" presentado no seu momento apenas achega razoamentos e datos, debendo quedar claro que a nova redefinición responde a criterios racionais e non simplemente intuitivos.

Por todo iso, o Grupo Municipal presente para a consideración da Corporación a adopción do seguinte



## ACORDO

**O Pleno insta á correspondente órgano do Concello de Santiago a que no proceso previo á licitación do servizo de transporte municipal:**

- **Incorpore á “Caracterización da nova Rede de Transporte Urbano” a metodoloxía e os fundamentos técnicos, sociais e económicos da modificación proposta.**
- **Desenvolva elementos explicativos (gráficos, mapas, tablas,...) para unha mellor comprensión das variacións que se contemplan entre as diferentes relacións de mobilidade, de forma que se permita comparar a situación actual e a situación prevista coa nova reordenación, con posibilidade de acceder a través da páxina web.**
- **Proceda a abrir un período de exposición pública para facilitar o acceso e a presentación de posibles suxestións individuais a cada un dos veciños e veciñas do concello.**
- **Valore a oportunidade de licitar o servizo de transporte público despois de elaborar o Plan de Mobilidade anunciado por este Goberno, para garantir a súa adecuación ao que dispoña a citada planificación, ou que, de considerarse innecesaria a elaboración dun novo documento planificador, se sigan as determinacións contidas no Plan de Mobilidade municipal actualmente vixente.**

Santiago de Compostela, a 9 de outubro de 2017



Alejandro S Brunete Varela  
Concelleiro do Grupo Municipal Popular

- Sr. Alcalde do Concello de Santiago de Compostela